

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

RJEŠENJE

**po Zahtjevu za pokretanje postupka podnesenom od strane privrednog subjekta
"Vitmark" d.o.o. Kotor Varoš protiv privrednog subjekta "Natura-Vita" d.o.o. Blatnica-Teslić,
radi utvrđivanja zloupotrebe dominantnog položaja**

**Sarajevo,
decembar 2012. godine**



Broj: 03-26-3-01-37-II/12
Sarajevo: 20.12.2012. godine

Na osnovu člana 25. stav (1) tačka e), člana 42. stav (1) tačka c), a u vezi sa članom 10. stav (2) tačka a) Zakona o konkurenciji ("Službeni glasnik BiH", br. 48/05, 76/07 i 80/09) u postupku pokrenutom Zahtjevom za pokretanje postupka broj: 03-26-2-01-II/12 od 29.03.2012. godine, privrednog subjekta "Vitmark" d.o.o. Kotor Varoš, Dabovci bb, 78225 Vrbanjci, Kotor Varoš, protiv privrednog subjekta "Natura-Vita" d.o.o. Blatnica-Teslić, Blatnica bb, 74270 Teslić, radi utvrđivanja zloupotrebe dominantnog položaja propisane članom 10. stav (2) tačka a) Zakona o konkurenciji, Konkurencijsko vijeće na 49. (četrdesetdevetoj) sjednici održanoj dana 20.12.2012. godine, donijelo je

R J E Š E N J E

- (1) Odbija se Zahtjev privrednog subjekta "Vitmark" d.o.o. Kotor Varoš, Dabovci bb, 78225 Vrbanjci, Kotor Varoš, protiv privrednog subjekta "Natura-Vita" d.o.o. Blatnica-Teslić, Blatnica bb, 74270 Teslić, za utvrđivanje postojanja zloupotrebe dominantnog položaja propisane članom 10. stav (2) tačka a) Zakona o konkurenciji, kao neosnovan.
- (2) Odbija se Zahtjev privrednog subjekta "Vitmark" d.o.o. Kotor Varoš, Dabovci bb, 78225 Vrbanjci, Kotor Varoš za naknadom troškova postupka u iznosu od 1.051,20 KM, kao neosnovan.
- (3) Ovo Rješenje je konačno i bit će objavljeno u "Službenom glasniku BiH", službenim glasilima entiteta i Brčko distrikta Bosne i Hercegovine.

O b r a z l o ž e n j e

Privredni subjekt "Vitmark" d.o.o. Kotor Varoš, Dabovci bb, 78225 Vrbanjci, Kotor Varoš (u daljem tekstu: "Vitmark" ili Podnosilac zahtjeva), podnio je Konkurencijskom vijeću Zahtjev za pokretanje postupka, zaprimljen dana 29.03.2012. godine, pod brojem: 03-26-2-01-II/12 (u daljem tekstu: Zahtjev), protiv privrednog subjekta "Natura-Vita" d.o.o. Blatnica-Teslić, Blatnica bb, 74270 Teslić (u daljem tekstu: "Natura-Vita"), zbog zloupotrebe dominantnog položaja propisane članom 10. stav (2) tačka a) Zakona o konkurenciji (u daljem tekstu: Zakon) i članom 9. tačka a) Odluke o definisanju kategorija dominantnog položaja ("Službeni glasnik BiH", br. 18/06 i 34/10).

Nakon uvida u dostavljenu dokumentaciju Konkurencijsko vijeće je utvrdilo da ista nije potpuna i kompletna, u smislu člana 28. stav (2) Zakona, te je dana 12.04.2012. godine aktom broj: 03-26-2-01-1-II/12, zatražio dopunu Zahtjeva.

Podnosilac Zahtjeva je traženu dopunu dostavio aktima zaprimljenim dana 27.04.2012. godine pod brojem: 03-26-2-01-2-II/12, dana 24.05.2012. godine pod brojem: 03-26-2-01-4-II/12, dana 25.05.2012. godine pod brojem: 03-26-2-01-5-II/12 (uplata takse), dana 28.05.2012. godine pod brojem: 03-26-2-01-

6-II/12, dana 13.06.2012. godine pod brojem: 03-26-2-01-9-II/12, dana 02.07.2012. godine pod brojem: 03-26-2-01-11-II/12 i dana 18.07.2012. godine pod brojem: 03-26-2-01-13-II/12.

Prilikom dostavljanja dokumentacije uz dopunu Zahtjeva, podnosilac Zahtjeva dostavio je i akt pod nazivom "Obavještenje o aktivnostima privrednog subjekta Natura-Vita", zaprimljen dana 04.06.2012. godine pod brojem: 03-26-2-01-8-II/12, kojim se obavještava Konkurencijsko vijeće o informaciji na web sajtu Ministarstva poljoprivrede Republike Srpske, da postoji namjera privrednog subjekta "Natura-Vita" da svoj "mliječni biznis" proda privrednim subjektima, mljekarama Mlijekoprodukt i IMLEK.

Podnosilac zahtjeva je samoinicijativno dostavio i akt pod nazivom "Informacija i dostava materijala", zaprimljen dana 01.08.2012. godine, pod brojem: 03-26-2-01-14-II/12, kojim je dostavljena dokumentacija vezana za predmetni slučaj.

Konkurencijsko vijeće je dana 07.09.2012. godine pod brojem 03-26-2-01-15-II/12, Podnosiocu zahtjeva izdalo Potvrdu o prijemu kompletnog i urednog Zahtjeva, u skladu sa članom 28. stav (3) Zakona o konkurenciji.

1. Stranke u postupku

Stranke u postupku su privredni subjekt "Vitmark" d.o.o. Kotor Varoš, Dabovci bb, 78225 Vrbanjci, Kotor Varoš i privredni subjekt "Natura-Vita" d.o.o. Blatnica-Teslić, Blatnica bb, 74270 Teslić.

1.1 Privredni subjekt "Vitmark"

Privredni subjekt "Vitmark", punim nazivom "VITMARK" Jednočlano, proizvodno i trgovačko društvo s ograničenom odgovornošću Dabovci bb, Općina Kotor Varoš, prema aktuelnom izvodu iz sudskog registra broj: 057-0-Reg-R-I-12-000720 od 11.06.2012. godine, upisan je u registar Okružnog privrednog suda Banja Luka, u registarski uložak broj: 1-2294-00 (JIB:4401129010001), sa upisanim osnovnim kapitalom od (..)*¹ KM i sa 100% vlasničkog udjela fizičkog lica Marković Vitomira, Dabovci bb, Općina Kotor Varoš, Bosna i Hercegovina.

Pretežne registrovane djelatnosti privrednog subjekta "Vitmark" su proizvodnja i trgovina na veliko mliječnih proizvoda.

Podataka o ukupno ostvarenom prihodu privrednog subjekta "Vitmark" za 2011. godinu nema, jer zbog prestanka rada nisu sačinjavani finansijski izvještaji za 2011. godinu, što dokazuje potvrda izdata od strane Agencije za posredničke, informatičke i finansijske usluge (APIF) a.d. Banja Luka poslovnica Kotor Varoš, izdata dana 21.06.2012. godine pod brojem: 01/IV-1366/12.

1.2 Privredni subjekt "Natura-Vita"

Privredni subjekt "Natura-Vita", punim nazivom Društvo sa ograničenom odgovornošću za proizvodnju i usluge "NATURA-VITA" Blatnica-Teslić, Blatnica bb, 74270 Teslić, prema izvodu iz sudskog registra privrednih subjekata Okružnog privrednog suda u Doboju broj: 60-0-Reg-12-000424 od 16.05.2012. godine, upisan je pod matičnim brojem: 60-01-0119-12 (JIB:4400098250002), sa upisanim osnovnim kapitalom od (..)* KM i sa 100% vlasničkog udjela fizičkog lica Đurić Vlade, Mladikovine bb, Općina Teslić, Bosna i Hercegovina.

¹ (..)* - Podaci predstavljaju poslovnu tajnu

Pretežne registrovane djelatnosti privrednog subjekta "Natura-Vita" (zajedno sa povezanim društvom "Natura-Milk" d.o.o. Slatina-Teslić koje je osnovano 24.05.2012. godine) su proizvodnja mlijeka i mliječnih proizvoda.

Dana 04.06.2012. godine ugovorima o prenosu udjela privredni subjekt "Natura-Vita", 100% vlasnik privrednog subjekta "Natura-Milk" d.o.o. Slatina-Teslić, prenio je svoje vlasničke udjele na privredne subjekte "Mlijekoprodukt" d.o.o. Kozarska Dubica (70% vlasničkih udjela) i "Imlek" a.d. Beograd (30% vlasničkih udjela), o čemu je Konkurencijsko vijeće donijelo Rješenje broj: 02-26-1-06-13-II/12 od 07.08.2012. godine, kojim se predmetna koncentracija ocjenjuje dopuštenom.

Ukupno ostvaren prihod privrednog subjekta "Natura-Vita" u 2011. godini iznosio je (..)* KM.

2. Pravni okvir predmetnog postupka

Konkurencijsko vijeće je u toku postupka primjenilo odredbe Zakona, Odluke o utvrđivanju relevantnog tržišta ("Službeni glasnik BiH", br. 18/06 i 34/10), Odluke o definisanju kategorija dominantnog položaja i Zakona o upravnom postupku ("Službeni glasnik BiH", br. 29/02, 12/04, 88/07 i 93/09).

Konkurencijsko vijeće je u skladu sa članom 43. stav (7) Zakona, u svrhu ocjene predmetnog slučaja, koristilo sudsku praksu Evropskog suda i odluke Evropske komisije, uključujući: Uredbu Vijeća (EZ) br. 1/2003 od 16. decembra 2002. godine o implementaciji pravila konkurencije iz člana 81. i 82. Ugovora o osnivanju Evropske zajednice (Službeni list L 1, od 4.1.2003. godine) i Saopćenje Komisije - Uputstvo o provedbenim prioritetima Komisije u primjeni člana 82. Ugovora o osnivanju Evropske zajednice na postupanja privrednih subjekata u dominantnom položaju koja za posljedicu mogu imati zloupotrebu u smislu isključivanja konkurenata sa tržišta (Službeni list C 045, od 24.02.2009. godine).

3. Zahtjev za pokretanje postupka

Zahtjev Konkurencijskom vijeću podnesen je od strane privrednog subjekta "Vitmark", radi utvrđivanja postojanja zloupotrebe dominantnog položaja privrednog subjekta "Natura-Vita", propisane članom 10. stav (2) tačka a) Zakona i članom 9. tačka a) Odluke o definisanju kategorija dominantnog položaja.

Podnosilac zahtjeva je kao razloge za podnošenje Zahtjeva u bitnom naveo slijedeće činjenice:

- Privredni subjekt "Vitmark" je se bavio preradom i proizvodnjom mlijeka i mliječnih prerađevina i za svoje potrebe vršio otkup mlijeka na području Općine Kotor Varoš. Mljekara privrednog subjekta "Vitmark" otpočela je sa radom 26.09.1999. godine i radila do maja 2007. godine, kada je prestala sa radom. Mljekara je ponovo pokrenula proizvodnju 09.12.2009. godine i radila sve do 21.01.2011. godine, kada je ponovo prestala sa radom i od tog datuma više nije radila;
- Zahtjev je podnešen protiv privrednog subjekta "Natura-Vita", radi utvrđivanja postojanja zloupotrebe dominantnog položaja propisane članom 10. stav (2) tačka a) Zakona i članom 9. tačka a) Odluke o definisanju kategorija dominantnog položaja, nametanjem nelojalnih otkupnih cijena mlijeka i diskriminacijom u visini otkupnih cijena mlijeka na različitim relevantnim geografskim tržištima. Podnosilac zahtjeva je naveo da je privredni subjekt "Natura-Vita" u periodu od 09.12.2009. godine do 21.01.2011. godine, samo za područje Općine Kotor Varoš imao specijalno visoku otkupnu cijenu mlijeka sa redovnim plaćanjem. Otkupna cijena mlijeka mljekare privrednog subjekta "Natura-Vita" u tom periodu na području opštine Kotor Varoš bila je 50 feninga za litar (za isporuku većih količina i 55 feninga) uz redovno plaćanje, dok je u istom periodu otkupna cijena na području Općine Teslić bila 44 feninga za litar, sa kašnjenjem u plaćanju, a na području Općine Kneževo 46,2 feninga za litar (stvarno isplaćivano 40 feninga);

- Dominantan položaj mljekare privrednog subjekta "Natura-Vita" na području Općina Teslić, Kotor Varoš, Kneževo i Čelinac, naročito je bio izražen u januaru 2010 godine, kada je mljekara privrednog subjekta "DTD" Šnjegotina prestala sa radom, a mljekara privrednog subjekta "Vitmark" ponovo otpočela sa otkupom i preradom mlijeka, u isto vrijeme je mljekara privrednog subjekta "Natura-Vita" povisila svoju otkupnu cijenu mlijeka za područje Općine Kotor Varoš;
- Otkupna cijena mlijeka na području Općine Kotor Varoš u posmatranom periodu mljekare privrednog subjekta "Vitmark" bila je 50-55 feninga za litar, odnosno u periodu od 09.12.2009. godine do kraja juna 2010. godine 55 feninga, a poslije toga sve do obustavljanja proizvodnje 21.01.2012. godine 50 feninga;
- Posljedica visokih otkupnih cijena mlijeka koje je davala mljekara privrednog subjekta "Natura-Vita" na tržištu Općine Kotor Varoš, je da mljekara privrednog subjekta "Vitmark" nije mogla da dođe do količina mlijeka potrebnih za rentabilnu proizvodnju, niti je mogla politikom niskih cijena da se izbori sa konkurencijom, te je ista prestala sa radom 21.01.2011. godine;
- Kao pravni i ekonomski interes za pokretanje predmetnog postupka, u skladu sa članom 27. stav (3) tačka a) Zakona, Podnosilac zahtjeva je naveo mogućnost da eventualnim pozitivnim rješenjem Konkurencijskog vijeća pokuša u sudskom postupku iznaći pravnu zaštitu i finansijsko obeštećenje, kao i mogućnost da ponovo pokrene preradu i proizvodnju mlijeka i mliječnih prerađevina, a s tim u vezi i otkup mlijeka na području Općine Kotor Varoš.

Konkurencijsko vijeće je ocijenilo da na osnovu Zahtjeva i dostavljene dokumentacije nije moguće utvrditi postojanje povrede Zakona na koje Podnosilac zahtjeva ukazuje, te je dana 20.09.2012. godine, donijelo Zaključak o pokretanju postupka, broj: 03-26-2-01-17-II/12 (u daljem tekstu: Zaključak).

Konkurencijsko vijeće je u skladu sa članom 33. stav (1) Zakona dana 21.09.2012. godine pod brojem: 03-26-2-01-22-II/12 dostavilo Zahtjev i Zaključak, na odgovor privrednom subjektu "Natura-Vita".

Privredni subjekt "Natura-Vita" dostavio je odgovor na Zahtjev i Zaključak, kao i traženu dokumentaciju, podnescima zaprimljenim dana 09.10.2012. godine pod brojem: 03-26-2-01-23-II/12, dana 09.11.2012. godine pod brojem: 03-26-2-01-26-II/12 i dana 18.12.2012. godine pod brojem: 03-26-2-01-36-II/12, kojima je u cijelosti osporena osnovanost Zahtjeva i između ostalog navedeno:

- Stvarne razloge prestanka rada, odnosno prestanka procesa proizvodnje privrednog subjekta "Vitmark" treba tražiti u samom društvu, a ne u navodima koje je privredni subjekt "Vitmark" dostavio Konkurencijskom vijeću iznoseći neistine i neutemeljene informacije;
- Neutemeljene su informacije privrednog subjekta "Vitmark" o otkupnoj cijeni mlijeka privrednog subjekta "Natura-Vita" na području Općina Kotor Varoš, Teslić i Kneževo za period 09.12.2009. godine do 21.01.2011. godine. Kao dokaz dostavljene su otkupne liste kooperanata privrednog subjekta "Natura-Vita" za Općine Kotor Varoš, Teslić i Kneževo sa ujednačenim cijenama. Prema navedenim otkupnim listama otkupna cijena mlijeka za posmatrani period u Općini Kotor Varoš iznosila je 50 feninga za litar, u Općini Teslić 47 feninga za litar i u Općini Kneževo 46 feninga za litar;
- Jedan od stvarnih razloga za prestanak rada privrednog subjekta "Vitmark" je gubitak sirovine, odnosno kooperanata usljed neplaćanja otkupljenog i preuzetog mlijeka, tako da nisu tačni navodi da niko iz Ministarstva poljoprivrede Republike Srpske i Općine Kotor Varoš nije ništa učinio da zaštiti interese društva "Vitmark", jer su stvarne žrtve neplaćanja otkupa mlijeka kooperanti, a ne mljekare;

- Pojašnjenje otkupnih cijena mlijeka privrednog subjekta "Natura-Vita" za područje Općine Kotor Varoš, bilo je da su cijene za navedeno tržište ponuđene od kooperanata, obzirom da su već imali izgrađenu vlastitu infrastrukturu za organizovani otkup, tako da mljekara "Natura-Vita" nije ništa morala ulagati u otkup. Mljekara DTD Šnjegotina koja je ranije vršila organizovani otkup na tom području imala je dogovorene cijene sa kooperantima, pa je iste bilo nezahvalno dirati, obzirom da su kooperanti sa područja Općine Kotor Varoš u tom periodu pripremali tužbu za višemilionska potraživanja. O navedenoj situaciji predstavnici privrednog subjekta "Natura-Vita" saznali su na proširenom sastanku u Općini Kotor Varoš u prisustvu pomoćnika načelnika za privredu i društvene djelatnosti i kooperanata, gdje se nastojalo iznaći rješenje, odnosno pomoć za kooperante da se uvede neka druga mljekara koja će vršiti otkup i uredno plaćanje;
- Da se ne radi o specijalnim otkupnim cijenama mlijeka za područje Općine Kotor Varoš, kako je to navedeno u Zahtjevu privrednog subjekta "Vitmark", ide u prilog činjenica da su otkupne cijene mlijeka ostale nepromijenjene i nakon prestanka rada mljekare "Vitmark" (dokaz za to su otkupne liste kooperanata u Općini Kotor Varoš za period 01.06.2011. godine do 30.06.2011. godine).

Nakon donošenja Zaključka privredni subjekt "Vitmark" samoinicijativno je dostavio nekoliko podnesaka vezanih za predmetni postupak (podnesci zaprimljeni: dana 26.10.2012.godine pod brojem: 03-26-3-01-25-II/12, dana 13.11.2012. godine pod brojem: 03-26-3-01-29-II/12 i dana 21.11.2012. godine pod brojem: 03-26-3-01-30-II/12) kojima su u većini ponavljane tvrdnje iz Zahtjeva, bez iznošenja novih činjenica i dokaza u odnosu na povredu Zakona čije utvrđivanje je bilo predmet postupka.

4. Usmena rasprava

Obzirom da se u predmetnom postupku radi o strankama sa suprotnim interesima i u svrhu pružanja mogućnosti strankama da se izjasne o činjenicama i okolnostima koje su od važnosti za donošenje konačnog rješenja, Konkurencijsko vijeće je u skladu sa članom 39. Zakona zakazalo usmenu raspravu.

Usmena rasprava je održana u prostorijama Konkurencijskog vijeća dana 28. novembra 2012. godine o čemu je sačinjen Zapisnik broj: 03-26-3-01-32-II/12.

Na usmenoj raspravi su bili prisutni direktor privrednog subjekta "Vitmark", te ovlaštenu opunomoćenik direktora privrednog subjekta "Natura-Vita".

Opunomoćenik privrednog subjekta "Natura-Vita" je na usmenoj raspravi dostavio dokumentaciju vezanu za predmet kao dokaz uz spis, koja je uzeta u prilog Zapisniku, a sačinjavala je: obavjest mljekare DTD Šnjegotina o otkupnoj cijeni mlijeka od 01.12.2007. godine, primjerak ugovora o poslovnoj saradnji sa kooperantima mljekare "Vitmark" od 09.06.2010. godine i knjigovodstveni izvještaj naknada za otkup mlijeka privrednog subjekta "Natura-Vita" u periodu 09.12.2009. godine do 21.01.2011. godine za Općine Kotor Varoš, Teslić, Kneževo i Čelinac.

Tokom usmene rasprave stranke su ostale kod svojih dosadašnjih iskaza i međusobno su usaglasile bitne činjenice koje se odnose na otkupne cijene mlijeka privrednih subjekata "Natura-Vita" i "Vitmark" na području Općine Kotor Varoš za period od 09.12.2009. godine do 21.01.2011. godine, gdje je utvđeno da je otkupna cijena mlijeka privrednog subjekta "Natura-Vita" bila 50 feninga, dok je otkupna cijena mlijeka privrednog subjekta "Vitmark" bila 55 feninga za period od 09.12.2009. godine do juna 2010. godine i 50 feninga nakon tog perioda sve do 21.01.2011. godine.

Opunomoćenik privrednog subjekta "Natura-Vita" je na usmenoj raspravi iznio tvrdnju da su cijene otkupa mlijeka na području Općine Kotor Varoš trenutno veće nego što su bile u periodu od 09.12.2009. godine do 21.01.2011. godine, te je traženo da se dokaz o tome dostavi u roku od 8 dana, što nije učinjeno.

Smatrajući bitnim za predmetni postupak direktor privrednog subjekta "Vitmark" izjavio je da je privredni subjekt "Natura-Vita" počela ranije sa otkupom mlijeka na području Općine Kotor Varoš (maj 2009. godine) nego što je to izjavio opunomoćenik direktora privrednog subjekta "Natura-Vita" (kraj 2009. godine) i obavezao se da će u roku od 8 dana dostaviti dokaze o tome. Međutim, privredni subjekt "Vitmark" je nakon usmene rasprave dostavio podnesak zaprimljen dana 07.12.2012. godine pod brojem: 03-26-3-01-34-II/12, kojim je obavjestio Konkurencijsko vijeće da navedene dokaze ne može pribaviti.

Shodno članu 105. Zakona o upravnom postupku, direktor privrednog subjekta "Vitmark" dostavio je Konkurencijskom vijeću podnesak zaprimljen dana 07.12.2012. godine pod brojem: 03-26-3-01-33-II/12, kojim traži naknadu troškova postupka u ukupnom iznosu od 1.051,20 KM.

5. Relevantno tržište

U skladu sa članom 3. Zakona i članovima 4. i 5. Odluke o utvrđivanju relevantnog tržišta, relevantno tržište se određuje kao tržište određenih proizvoda koji su predmet obavljanja djelatnosti privrednih subjekata na određenom geografskom području.

Prema odredbi člana 4. Odluke o utvrđivanju relevantnog tržišta, relevantno tržište proizvoda obuhvata sve proizvode koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Prema odredbi člana 5. Odluke o utvrđivanju relevantnog tržišta, relevantno geografsko tržište obuhvata cjelokupan ili značajan dio teritorije Bosne i Hercegovine na kojem privredni subjekti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuju od uslova konkurencije na susjednim geografskim tržištima.

Kao relevantno tržište proizvoda predmetnog postupka utvrđeno je tržište otkupa svježeg kravljeg mlijeka za potrebe procesa rada u mljekarama.

Kao relevantno geografsko tržište predmetnog postupka utvrđeno je tržište Općine Kotor Varoš, obzirom da je Podnosilac zahtjeva svoju djelatnost obavljao samo na teritoriji Općine Kotor Varoš, na koju se i odnosio njegov Zahtjev za utvrđivanje postojanja zloupotrebe dominantnog položaja privrednog subjekta "Natura-Vita".

U smislu navedenog, Konkurencijsko vijeće je kao relevantno tržište predmetnog postupka utvrdilo tržište otkupa svježeg kravljeg mlijeka za potrebe procesa rada u mljekarama na teritoriji Općine Kotor Varoš.

6. Analiza relevantnog tržišta

Konkurencijsko vijeće je u skladu sa Zahtjevom vršilo analizu relevantnog tržišta samo za period 09.12.2009. godine do 21.01.2011. godine, odnosno za period u kojem je mljekara privrednog subjekta "Vitmark" radila.

Obzirom da se radilo o utvrđivanju povrede Zakona iz člana 10. stav (2) tačka a) u vezi sa članom 9. tačka a) Odluke o definisanju kategorija dominantnog položaja, koja se odnosi na diskriminaciju u visini cijena (različite cijene) određenog proizvoda ili usluga na različitim relevantnim geografskim tržištima, a u skladu sa Zahtjevom, Konkurencijsko vijeće se u svrhu ocjene predmetnog slučaja koristilo podacima vezanim za cijene otkupa mlijeka privrednog subjekta "Natura-Vita" na tržištima Općina Teslić i Kneževo.

Prema procjeni Podnosioca zahtjeva na relevantnom tržištu Općine Kotor Varoš u periodu od 09.12.2009. godine do 21.01.2011. godine, otkup mlijeka su vršile samo mljekare privrednih subjekata "Vitmark" i "Natura-Vita", od čega je udio mljekare "Vitmark" bio (..)* %, a udio mljekare "Natura-Vita" (..)* %.

7. Ocjena dokaza

Na osnovu uvida u dokumentaciju iz spisa predmeta, usmene rasprave i izvedenih dokaza, Konkurencijsko vijeće je utvrdilo slijedeće:

- Privredni subjekt "Natura-Vita" vršio je otkup mlijeka u Općinama Kotor Varoš, Teslić i Kneževo u periodu 09.12.2009. godine do 21.01.2011. godine, sa malim odstupanjima cijene u zavisnosti od općine. Utvrđena cijena otkupa u navedenom periodu u Općini Kotor Varoš bila je 50 feninga za litar, u Općini Teslić 47 feninga za litar i u Općini Kneževo 46 feninga za litar. Razlike u cijeni privrednog subjekta "Natura-Vita" na navedenim tržištima su posljedica specifičnosti svakog tržišta pojedinačno i vezane su za infrastrukturu otkupa mlijeka, cijene naslijeđene od privrednih subjekata koji su ranije vršili otkup mlijeka, dogovore sa kooperantima i organima lokalne samouprave, kao i postojanjem tržišne konkurencije;
- Privredni subjekt "Vitmark" vršio je otkup mlijeka u Općini Kotor Varoš u periodu od 09.12.2009. godine do 21.01.2011. godine sa otkupnom cijenom od 55 i 50 feninga za litar mlijeka. U periodu od 09.12.2009. do juna 2010. godine cijena otkupa mlijeka bila je 55 feninga, a nakon tog perioda sve do 21.01.2011. godine bila je 50 feninga. Prema navedenim podacima privredni subjekt "Vitmark" u prvom periodu imao je veću cijenu otkupa mlijeka od privrednog subjekta "Natura-Vita", dok je u drugom periodu imao istu otkupnu cijenu mlijeka. Navedene činjenice dokazuju da otkupna cijena mlijeka na području Općine Kotor Varoš privrednog subjekta "Natura-Vita" od 50 feninga za litar, nije bila nametnuta i nelojalna, čemu pridonosi i činjenica da je cijena otkupa mlijeka ostala ista i poslije prestanka rada mljekare privrednog subjekta "Vitmark".

Nakon sagledavanja svih relevantnih činjenica i dokaza stranaka u postupku, pojedinačno i zajedno, Konkurencijsko vijeće je utvrdilo da privredni subjekt "Natura-Vita" nije prekršio član 10. stav (2) tačka a) Zakona, u smislu da je direktno ili indirektno nametao nelojalne kupovne i prodajne cijene ili druge trgovinske uslove kojima se ograničava konkurencija.

Slijedom navedenog, Konkurencijsko vijeće je odlučilo kao u tački 1. dispozitiva ovog Rješenja.

8. Troškovi postupka

Članom 105. stav (1) Zakona o upravnom postupku propisano je da u pravilu svaka stranka sama snosi svoje troškove prouzrokovane postupkom.

Podnosilac zahtjeva je podneskom zaprimljenim dana 07.12.2012. godine pod brojem: 03-26-3-01-33-II/12, podnio zahtjev za naknadu troškova u ukupnom iznosu od 1.051,20 KM.

Konkurencijsko vijeće je odbilo zahtjev privrednog subjekta "Vitmark" za nadoknadu troškova postupka u novčanom iznosu od 1.051,20 KM. Obzirom da je navedeni postupak izazvao svojim djelovanjem i da nije uspio u svom Zahtjevu, nema pravo na nadoknadu troškova postupka, u smislu Zakona o upravnom postupku.

Slijedom navedenog, Konkurencijsko vijeće je odlučilo kao u tački 2. dispozitiva ovog Rješenja.

9. Administrativna taksa

Podnosilac zahtjeva, privredni subjekt "Vitmark", obavezan je platiti administrativnu taksu u iznosu od 1.500,00 KM u korist Budžeta institucija Bosne i Hercegovine, u skladu sa članom 2. Tarifni broj 107. tačka f) Odluke u uplati administrativnih taksu u vezi sa procesnim radnjama pred Konkurencijskim vijećem ("Službeni glasnik BiH", br. 30/06 i 18/11).

10. Pouka o pravnom lijeku

Protiv ovoga Rješenja nije dopuštena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednica

Gordana Živković